

普  
曜  
經



百九十九  
鳴十

48071



77



普曜經卷第八

西晉三藏法師竺法護譯

鳴

佛至摩竭國品第二十六

尔時世尊在波羅奈說經已竟與千羅漢優  
為迦葉兄弟三人等悉舊編髮神通以達生  
死已斷行出三界欲至摩竭流布道訓開化  
愚冥時摩竭國蒞沙王聞釋種王子身有奇  
相三十有二八十種好巨身丈六體紫金色  
棄國捐王行作沙門得自然佛号如來至真  
等正覺明行成爲善逝世間解無上士道法  
御天人師爲佛衆祐講宣道義上中下善義  
達微妙所演具足淨修梵行戒禁具足定成



慧成解成度知見成成就五眼肉眼天眼慧  
眼法眼佛眼六通三達諸天釋梵皆奉事焉  
莫不蒙濟時萍沙王聞之欣然大悅吾本共  
要得佛相度勅諸大臣長者梵志國中吏民  
嚴治道路散華燒香持諸幢蓋王乘羽寶之  
車大臣百官前後道從千乘萬騎長者梵志  
萬二千人欲出城迎忽大風起閉其城門王  
恠所以今行迎佛當有吉喜使善瑞應時城  
門神即謂王言快吉無不利王徃前世與八  
萬四千王治寺起塔誓言於來世一時見佛  
諮受道教今有一人閉在刑獄違其本誓故  
城門閉當放大赦獄中人出同時見佛諮受



訓誨城門乃開王聞乃達速勅詔板普赦境土  
獄囚得出一時往迎時佛入國有大社樹名  
曰遮越佛與比丘共坐樹下王遙見佛與比  
丘衆如星中月猶如日出天下大明靡不照  
曜亦如帝釋梵王聖帝處於本宮如樹華茂  
晃若金山威神特顯光明巍巍超絕無侶王

心踊躍下車步進釋五威儀除蓋履扇冠幘  
刃仗前稽首佛足自稱其号我是國王泚沙  
身也久服聖尊飢虛積時如是至三佛告王曰  
實如來言是王泚沙也諸佛天神皆護王身  
王曰蒙祐退坐一面群臣百官稽首遷坐一  
面前者作禮中者低頭後者叉手皆却坐訖

王及臣民覩優為迦葉在山學仙者舊來久  
恠之佛邊心自念言佛是優為師耶優為是  
佛師乎佛覩心念即告優為說偈言

云何卿優為

本可所事神

祠祀歸水火

日月衆梵天

事來為幾何

夙夜精進學

心中不懈廢

寧益致神仙

於時迦葉以偈報佛

自念祠祀來

以歷八十年

奉風水火神

日月諸山川

夙夜不懈廢

心中無他念

至竟無所獲

值佛乃安寧

王及群臣國中萬民亦乃別知優為迦葉是  
佛弟子佛告優為迦葉起迦葉即起長跪叉手



佛前佛言現若羅漢道神輒受佛教躡在虛  
空身上出火身下出水身上出水還雨其身  
而身不濕身下生火火無所傷飛行虛空猶  
如飛鳥七現七沒行於水上猶如履地不礙  
牆壁須彌山地若如入水從東方來沒佛前地  
忽然現西從西方來沒佛前地忽然現南南沒北  
現北沒南現變化以訖還在佛前長跪叉手  
而白佛言我是佛弟子佛是我師王及臣民  
介乃重明優為迦葉是佛弟子也佛告王曰  
天下有眼未必色故也觀色無常痛想行識  
亦復無常無常苦空非身之義非我非彼未  
有好道而樂色者明士達之色如聚沫痛痒

如泡思想芭蕉行亦如夢識喻如幻三界如  
化一切無常不可久保佛告王曰造宮殿來  
為幾何年王白佛言七百餘年為更幾王王  
白佛言更二十餘王佛問王曰悉識諸王不  
王曰不識唯知吾父耳佛言現地有常人物  
一切皆歸無常天地雖現尚不可久三界無  
怙唯道可恃絕禍於未萌植福於未然滅盡  
五陰衆患之難如消炬火積德日進如月之  
初佛言王猶如母人懷子在胞胎相祿各異  
或豪貴貧賤智明愚冥瘖瘂父母豈知  
乎然後生長乃別禍福非二親過是其宿殃  
所作善惡非父母咎也身行惡業口宣麁言



心念毒惡誹謗賢聖壽終身散鬼神墮惡地  
獄之中身口心善不犯十惡修行十德壽終  
生天十方佛前若在人間豪貴富樂其命永  
長佛言雖有是禍福言辭未必純一所以者  
何皆從緣起緣合則生緣散則滅從無明緣  
則有行從其行緣則有識從其識緣則有名  
色從名色緣則有六入從六入緣則有所更  
從所更緣有痛癢從痛癢緣則有恩愛從恩愛  
緣則有所受從所受緣則有所有從所有緣  
則有生矣從所生緣則老病死憂悲苦惱大  
毒患合以除無明行識名色六入更痛愛受有  
生老病死憂愁苦惱大毒患滅衆罪毒患自

然消滅乃至無爲無窮之業無三界神十二  
緣起之根株坦然無迹猶如虛空無心意識  
無所存立與大道同分別本無逮得法忍獨  
步無雙度脫十方衆生蒙恩佛說是經時八  
萬四千諸天世人萬二千遠塵離垢諸法眼  
淨生無央數人皆發無上正真道意時滂沙  
王得法眼淨心中欣然前受五戒大臣百官  
國民皆前歸命亦受五戒受五戒時人馬車  
乘咸悉寂然不暢音聲王前白佛吾國多事  
欲退比更親奉佛言善哉勞屈王群臣民庶  
王稽首禮繞佛三帀重禮而去群臣百官人  
民次禮而還大臣賀王前時諸王悉不見佛



今獨王見宿福祿厚故乃尔耳王益欣踊亦  
賀諸臣卿等本德值是聖尊王還宮中勅宮  
夫人媠女大小及國吏民歲三齋月六齋守  
禁法施戒博聞王適歸宮時天帝釋將八萬  
天散華佛上歸命作禮而去言南無佛尋皆  
悉度得法眼淨時摩竭國有一長者名曰迦  
陵見佛入國天人所奉而無精舍我有好園  
欲以上佛往詣佛所稽首足下前白佛言佛  
愍一切如親愛子棄轉輪王不慕世榮今無  
精舍有一竹園去城不遠願以奉佛可作精  
舍佛受呪願佛及聖衆遊處其中是故名曰  
迦陵竹園

化舍利弗目連品第二十七

佛未入摩竭國時國民豐富饒美飲食作樂  
倡伎常歡不廢夙夜遊戲佛適入國羅閱祇  
城晝夜寂寞誦聲濟濟齋戒讀經捨世俗樂  
如棄糞除唯佛是尊聽經行法不捨三寶佛  
有沙門名曰安陞遣行宣法開化未聞五濁  
之世人心荒迷不達至真入城分衛衣服整  
齊威儀禮節不失常法行步安庠因是使人  
見之心悅時舍利弗本字優波替而遙見之  
心中欣然心自念言我學來久未曾覩此沙  
門衣服禮節安詳齊整不失儀節試往問之  
所奉何道吾常意疑當有異聞殊妙之道未



必齊此往問比丘所事何道誰爲師主願聞其志比丘知意即說偈言

吾師三界尊 有三十二相 等不存有無

度衆十二門 我年旣幼稚 學根近薄尠

豈能宣至真 如來無極業 一切諸法本

從緣悉本無 若能反本原 乃名曰沙門

安陞沙門答曰吾所事師從無數劫奉行六

度無極之法四等四恩行無蓋哀奉無極慈

欲度一切積功累德不可稱載一生補處在

兜術天降神現存寄迦維羅衛國夫人之胎

如日現水生行七步天地大動瑞三十二稱

已聖音三界皆苦吾當度之釋梵四王咸來

啓受九龍浴身其德無量粗舉其要非吾螢  
燭所歎究悉亦非心口之所言思是吾大師  
天人之尊於是頌曰

吾師天中天 三界無極尊 相好身丈六

神通猶虛空 化訓去五陰 拔十二根本

不貪天世位 心淨開法門

時舍利弗欣然大悅如寘覩明口言善哉昔  
來抱疑又吾好學八歲從師至年十六靡不  
周綜行遍天下十六大國自謂以達今乃聞  
異無上正直得吾本願今佛在何答曰在迦  
陵竹園將諸弟子往詣佛所稽首足下問訊  
至尊身墮愚冥迷惑歷載不得諮受今乃奉



聖無極大道願聽出家得爲比丘受成就戒  
佛言善哉呼比丘來頭髮自墮袈裟著身佛  
爲說經分別諸法十二根本坦然意達漏盡  
意解得無著果前白佛言吾有同學俗字拘  
律今名目連少小相順要有至真以相開示今  
以蒙濟彼沒塵垢未得拔出承尊聖旨往開

示之佛言善哉宜知是時勿得稽留時舍利  
弗稽首佛足辭出入城求目捷連遙見目連  
與諸弟子遊行城裏街曲里巷舍利弗趣之  
目連覩見體改服變不與常同問之所以被  
服變改有何異見答曰學人無常唯行大明  
吾學積年不值大聖今乃遇之無上大道欣

慶無量故來相求同其道味累劫無窮目連  
答曰是非小事善共思惟舍利弗曰無須重  
言吾馱從事不復欲聞假喻言人有珍妙施  
有得大寶真如意明珠及獲寶英復欲反求帛祠  
偽珠非身所欲目連答曰仁智勝我常兄事卿  
必不相誤便當同志將吾受訓稽首至尊時  
舍利弗與目捷連俱往詣佛所稽首佛足退  
坐一面叉手白佛違曠侍省沈沒塵垢今乃  
奉覲願為沙門啓受法律佛言善哉即除澡  
瓶屏鹿衣杖具佛呼比丘來頭髮自墮袈裟  
著身為說正諦漏盡意解所作已辦成無著  
果佛言此二人等往古世時誓供養我待吾



道成侍衛左右今乃相值本有千弟子得舍利  
弗目連有二百五十人合千二百五十比丘一時所  
度時王遙聞子得佛道以來六年王念久已心  
中悲喜飢虛欲覩有一梵志名優陀耶聰明  
智慧本侍菩薩常得其意王告優陀往請迎  
佛問評別闍已來十有二年夙夜愁感不捨其  
心思一相見如復更生優陀受教往到佛所稽  
首佛足具以王意白佛優陀見佛諸天釋梵  
歸禮一切受命前白佛言願得出家以為沙  
門佛言呼比丘來頭髮自墮便成沙門得羅  
漢道佛時所度其餘前後得道所度不可稱  
計佛自念曰本與父王要得佛道今乃還國

當度父母今正應還設若還國無所感動於  
事不宜所化甚少先遣神足弟子比丘優陀  
耶往顯示神足知佛欲往乃解道尊咸共渴  
仰發起道心所度乃多

優陀耶品第二十八

尔時世尊告優陀耶佛本出家與父母誓若  
得佛道還度父母今以得佛道德以成必當  
還國不違本誓汝以神足經行虛空現其神  
變乃知吾身已成大道弟子尚尔况佛威德  
巍巍無量尔乃信受優陀受教神足飛行經  
遊虛空往到本國迦維羅衛城上虛空現無  
數變身上出水身下出火水不濕身火無所



傷七現七沒從東沒地出於西方西沒東出  
南沒北出北沒南出行空如鳥沒地如水履水  
如地王及臣民莫不欣喜乃知道尊於是頌曰  
佛從本所行 生死無數變 常愍蚰飛類  
勤苦無量劫 時坐佛樹下 逮致本宿願  
歡喜當聽說 難得數見聞 適成佛道時  
輒降魔官屬 即壞生死本 消愛欲無餘  
佛念本生地 意欲見親族 今聽王頭檀  
所說甚可悲 比丘名優陀 姿性能悅人  
佛遣使令行 孚致消息來 還入父王國  
以入宣佛意 今王太子願 意欲還至宮  
優陀聞佛教 即聽受奉行 因時於佛前

變化墮地形  
乃至大王殿  
進現悅頭檀  
淨譬如蓮華  
即問斯何靈  
此形姓為誰

其身忽不現  
父王所坐前  
變化若干品  
泥土塵不生  
將無是神祇  
本從何得斯

神足來入城  
比丘優陀耶  
涌出父王殿  
父王見恐怖  
出地何恠尔  
願以開吾意

令心疑結解  
太子本棄國  
於今乃得成  
我以壞衆惡  
淚下如雨星  
今從吉祥至

從生至於今  
求道度衆生  
今王莫恐畏  
為王太子使  
十二年已來  
思寤如更生

未曾覩是變  
慕勤無數劫  
且寬意悅豫  
王聞太子問  
乃承悉達聲  
太子捨國位



成道号何名

出國坐六年

精進現成佛

号曰天中天

三界尊第一

本時在我國

為作眾寶殿

刻鏤諸妙飾

於今室何如

優陀所答曰

佛之正真微

常坐於樹下

諸天來歸趣

吾子在宮時

細褥布紈緹

皆以錦繡成

柔軟有光澤

龍妻奉寶牀

天帝貢袈裟

不以好衣喜

其心無增損

在國好美食

甘饅恣其味

今所服食者

安身何等類

執鉢行分衛

福眾無麁細

呪願布施家

世世令安隱

悉達卧寤時

不敢妄呼覺

鼓琴發歌音

尔時令寐起

如來三昧定

夙夜無眠覺

釋梵來勸助

皆現稽首受 在家雜香浴 若干種眾馨  
香香遍室中 今用何所香 八解三脫門  
洗浴除心垢 其心淨如空 普安無惱憂  
悉達在家時 擣若干雜香 香熏其衣服  
清淨無垢障 戒定慧解度 以為道德香  
熏于八難處 出世度十方 四品好牀座  
以若干寶成 重疊布眾具 以卧起其上  
四禪為牀坐 意定無憤乱 清淨如蓮華  
不著于泥水 在宮無數兵 諸臣而宿衛  
左右常擁護 目不見惡穢 諸弟子眾俱  
千二百五十 菩薩無央數 皆來稽首禮  
本在家未出 有四品好車 象馬牛羊步



遊行觀四方

五通以驂駕

徹視洞聽飛

觀本見衆心

遊觀度生死

子出行徃反

幢旄羽雕飾

前後諸導從

各執諸兵仗

四等慈悲護

恩惠仁愛度

普覆衆厄難

以嚴飾衆生

出時雜伎樂

椎鐘及鳴鼓

觀者悉填路

前後不相容

樹下波羅柰

椎鳴不死鼓

拘鄰等得道

八萬四千天

九十六道伏

其音聞三千

衆生莫不悅

啓受心皆明

所領何國土

人民為多少

所化有幾人

悉為歸伏不

領三千大界

訓化諸群生

十方不可稱

莫不蒙濟度

在國思正法

助吾治万民

動順禮節訓

莫不承教聞

佛解空本無

捨于四顛倒

靡不歸伏者

神靜無為業

佛與世無雠

博達無不備

汝言何不反

一切皆自歸

正天下滿人

一人頭若干

一頭若干舌

舌解無數義

合集恒沙人

嗟歎佛功德

恒沙劫不暢

況我螢燭明

王聞益悲喜歎曰善哉善哉阿夷言不妄佛當來不何日當至乎優陀報曰却七日到王大踊躍即勅群臣國中萬民吾往迎佛導從威儀法轉輪王平治道路掃除令淨香汁灑地懸繒幡綵豎其幢蓋周遍國內其所修治光飾盡宜千乘萬騎出四十里往奉迎佛稽



首歸命優陀耶前報王曰本受佛教奉命見  
主宣其意故今還宣命說王意言飢虛無量  
欲見至尊稽首受法并化萬民咸蒙福慶王  
曰宜知是時勿復稽留

余時優陀耶還來詣佛所稽首足下以啓國  
王世尊及諸弟子自期七日當還本國王及  
臣民莫不欣悅別來積年夙夜想念飲食不  
甘寢不能寐飢虛日久計日度時須世尊到  
以竟七日於時大聖告諸弟子明日當發至  
迦維羅衛見於父王皆嚴整衣服護持應鉢  
梵釋四王聞佛還國皆來侍送天雨香汁散  
華燒香豎諸幢蓋四王諸天皆在前導梵天

侍右帝釋侍左諸比丘衆皆隨佛後諸天龍  
神華香伎樂追於上侍佛適進路先現瑞應  
三千國土六反震動百歲枯樹皆生華實諸  
枯竭溪澗自然泉水王見此瑞知佛以來勅  
諸釋種大臣百官皆行詣佛散華燒香暨諸  
幢幡鼓衆伎樂悉出奉迎王遙見佛在於太  
衆如星中月如日初出照於朝陽如樹華茂  
芬葩熾盛巨身丈六相好嚴身晃如金山王  
覩悲喜前稽首足離別彌時今乃相見大臣  
百官皆稽首禮即還入城足蹈門闔地為大  
動天雨衆華樂器皆鳴盲者得視聾者得聽  
拘躄得行病者得愈瘖者能言狂者得正僂



者得伸若被毒者毒為不行百鳥禽獸相和  
悲鳴婦女珠環相振作聲當爾之時見此變  
化莫不歡喜室寶藏者自然發出中滿玲瓏  
懷異心者皆共和同等心义手自歸命佛諸  
畜生類蒙其光潤皆得生天懷妊女人蒙斯  
光明苦痛微薄皆得在產端正姝好消淫怒  
癡無復塵勞展轉相視如父如母如兄如弟  
如子如身地獄休息餓鬼飽滿尋光來至歸  
命世尊皆發道意王見佛巨身丈六相好光  
明體紫金色諸根寂定如星中月晃如金山  
天帝梵王四王所奉覩諸梵志久在山中暴  
露身形日炙風飄身體黑醜在佛邊侍猶如

黑鳥在紫金山不能發起顯佛大德今一切  
悅便勅國中諸豪族釋端正姝好顏貌殊異  
選五百人出爲沙門侍佛左右猶如鳳凰在  
須彌山亦如摩尼著水精罽毼佛弟難陀亦作  
沙門未下鬚髮時難陀有曲監作剃頭師前白  
佛言人身難得佛世難值明時叵遇今我丈夫  
及諸尊者識道至高不可限量不慕世榮捨  
棄尊位行作沙門今我小節下劣靡逮何所  
貪樂不出爲道乎唯佛愍哀濟救三塗沒溺  
塵埃拔爲沙門佛言善哉佛時便呼比丘來  
頭髮則墮袈裟在身即成沙門禮諸沙門因  
隨次坐難陀在後作次第禮到此沙門則住不



禮心自念言是我家僕不能為禮佛知告難  
施佛法大通舉學前後不在尊卑猶如大海悉  
受萬川四流不避汙塗執心如地四大俱等  
地水火風內外無異其神空淨所著為名宜  
棄自大以法自將乃應先聖無極道訓時難施  
見佛教誨切至事不得止解了本無棄捐自大  
下意為禮天地大動眾會咸歎善哉善哉為  
道等心除自高意而下卑心感於天地為之  
大動從是制法先學為長後學為小法之常  
宜各無所恨無所諍訟時佛入宮坐於殿上  
王及臣民日日供養百種甘饌佛說經法所  
度無量俱夷携乃羅云來稽首佛足占對問訊

久違侍覲曠廢供養時王僚屬皆懷沈疑太子捐國十有二年何從懷妊生子羅云佛語父王告諸群僚俱夷守節貞潔清淨無有瑕疵設王不信今當現證於時世尊化諸衆僧皆使如佛相好光明等無差異於時羅云厥年七歲俱夷即以指印信環與羅云言是汝父者以此與焉羅云應時直詣佛所以印信環而授世尊王及群臣咸皆欣踊稱言善哉所現無量真佛子也佛語父王及諸臣曰從今已後無復懷疑此吾之子緣吾化生勿各俱夷也王得道證俱夷受戒淨修梵行宮人大小感受戒法月六齋歲三齋奉持不懈國內清



寧風雨以節時不越叙五穀豐賤民安其所  
萬邦黎庶咸來慶賀道德滋茂如月之初

歎佛品第二十九

於是世尊告神妙天大神妙天歡預天加歡  
天栴檀天大悅天寂然天寂律天如是等類  
爭居天子伴黨八人佛以大會轉於法輪為  
一切故救濟十方勿令廢斷開眾生意經布  
天下乃報佛恩於時世尊復告大神妙天子  
今此經典名曰普曜大方等典諸菩薩力所  
可娛樂遍諸佛界悉令咸聞經所入處靡不  
晃昱佛自口宣當速受之持諷誦讀是佛法  
目普令流布若菩薩學聞是經法其心堅強

精進奉行無上正直之道為最正覺若有衆  
生樂微妙者任大乘法心念無疑降魔羅網  
悉諷誦已必獲大雅諸外異學不得其便勸  
助覺微成大德本至於大乘若有賢人設聞  
說是普曜經典义手自歸即捨八事懈怠之  
本成八功德重何謂為八一得端正好色二  
得力勢强盛三得眷屬滋茂四逮得辯才無  
量五學疾得出家六所行清淨七得三昧定  
八得智慧明無所不照是為八若有人為法師  
布座諷誦是經當得八座何謂為八一得長者  
座二得轉輪王座三得天帝座四得自在天  
座五得梵天座六者菩提樹下降伏魔怨座



七得如來座八得轉法輪度脫一切座是爲  
八若有法師頌宣是法設有讚歎言善哉者  
當得八清淨行何謂爲八一曰言行相應無  
所違失二曰口言至誠而不虛妄三曰在於  
衆會真諦無欺四曰所言人信不捨遠之五  
曰所言柔軟初無麤獷六曰其聲悲和猶如  
哀鸞七曰身心隨身音聲如梵會中人聞莫  
不諮受八曰音響音如佛可衆生心是爲八若有  
書是普曜經典者著於竹帛不慳惜經心不懷  
妬衆人嗟歎三十四行名德流布若復學是經  
典得八大藏何謂八一曰得意藏未曾妄捨二曰  
所得心藏無所不解分別經法三曰得往來藏

普解一切諸佛經法四曰得摠持藏一切所聞皆  
能識念五曰得辯才藏為衆生頒宣經典皆歡  
喜受六曰法藏將護正法七曰道意法藏未曾  
斷絕三寶法教八曰奉行法藏則輒逮得無所  
從生忍是為八大法藏若有受是普曜經典諷  
誦受持得具八業何謂為八一曰施業無慳妬  
心二曰戒業具足諸願三曰聞業合集智慧至  
阿惟顏四曰寂業勤於一切定意正受五曰見  
業悉能具覩三達之智六曰福業具於相好  
訓誨佛國七曰慧業為衆說法應病受藥八  
曰大哀業為於十方植衆德本而無懈倦受持  
是普曜法心自念言使一切衆生皆逮是法以



是德本復得八大福何謂為八一曰轉輪聖王  
成大福德覩見無極建立篤信二曰得作四天  
王三曰得作帝釋四曰得作炎天王五曰得作  
兜術天子六曰得作無憍樂天七曰得作化  
自在天八曰得成如來斷諸不善法具足諸善本  
是為八若有受此普曜經者若至心聽且貫係  
意得八清淨心何謂為八一曰常行慈心消除  
瞋恚二曰常行愍哀除衆患害三曰常行喜悅  
除諸不樂四曰常行於護除諸結著五曰修四  
禪行在於欲界而得自在六曰行四無色定而  
得由己七曰得五神通遊諸佛土除諸罣礙衆  
蓋之患八曰逮得勇伏定意獨步三界是為八

囑累品第三十

尔時世尊告賢者大迦葉賢者阿難弥勒菩薩我從無數劫遵習是法乃成無上正真之道囑累汝等以手相付受持諷誦廣為人說於時世尊欲使此法普悉周布十方說是偈言佛目所覩衆生類

若有供養億千劫  
加復供養辟支佛  
計此功德超過彼  
一切衆生成緣覺  
飲食衣服牀卧具  
若有一心义十指

皆得羅漢如身子  
乃復前進如江沙  
若有一日奉斯經  
其阿羅漢不足立  
若有供養億數劫  
持香雜香及名華  
等心自歸一如來



口自發言南無佛  
一切衆生皆成佛  
衣被飲食牀卧具  
若有正法欲傾危  
若有一日常晝夜  
若有奉事十方佛  
若能堅固此道心  
一切經卷是道諦  
供養奉事諸如來  
其人辯才無等倫  
智慧正義無有損  
諸導師慧無邊底

是功德福為最上  
若有百劫供養者  
擣香雜香及名華  
棄捐其身自沒命  
護是法者必超彼  
及於緣覺諸聲聞  
受斯要典諸法王  
若諸如來如恒沙  
若有手得是經卷  
分別一句至億劫  
若以是經為人說  
計無有人與等者

猶如江海不可盡

聞是法者等若滋

佛告賢者迦葉阿難弥勒重相囑累受之持  
之諷誦學之令普流布示其同學及十方人  
皆令蒙濟使不斷絕展轉相教展轉相成使  
不稽留三寶不斷乃報佛恩佛說如是大神  
妙天及淨居天子弥勒菩薩賢劫菩薩及大  
迦葉諸大弟子天龍鬼神捷沓和阿須倫聞  
佛所說莫不歡喜奉行

普曜經卷第八

鳴

編

反綿織也

洪沙

上音瓶

千乘

下時證

萬騎

下

寄根株

正作

安陞

蒲味

周綜

下子送

且然

奇



上舌反 稽留 上音鷄也 稽首 上音啓也 屏鹿 上音餘也 鮮孚

芳無反 刻鏤 刻 二音 宛 延 二音 駮 駕 上音舍反

信也 馬也 駕 倭 椎 鍾 上音直也 無 雥 下音 足 蹈 下音盜

門 閫 下音苦本反 拘 癖 下音正作 筵 必亦反 瘦者

上音 倭 背 曲 之 疾 也 妹 好 未反 曝 露 上音蒲不反 謂

巨 不 可 也 五 穀 下音 晃 晃 上音胡廣反 明也

猪飼長治亭附

